

四庫全書

集部

欽定四庫全書

集部

御定佩文齋詠物詩選卷二百三十三

詳校官侍郎_臣李封

主事銜_臣徐以坤覆勘

總校官檢討_臣何思鈞

校對官主事_臣張培

謄錄監生_臣李炎

欽定四庫全書

御定佩文齋詠物詩選卷二百三十三

佛類

四言古

念佛三昧詩

晉
王齊之

妙用在茲涉有覽無神由昧徹識以照麤積微自引因
功本虛泯彼三觀忘此毫餘

其二

寂漠何始理元通微融然忘適乃廓靈暉心游緬域得
不踐機用之以冲會之以希

其三

神資天疑圓暎朝雲與化而感與物斯羣應不以方受
者自分寂爾淵鏡金水塵紛

其四

慨自一生夙乏惠識託崇淵人庶藉冥力思轉毫功在
深不測至哉之念主心西極

惟衛佛像銘

梁
簡文帝

灼灼金容巍巍滿月永被人天常留花窟

釋迦文佛像銘

簡文帝

至矣調御行備智周滿月為面青蓮在眸心珠可瑩智
流方普永變身田長無沙鹵

式佛像銘

簡文帝

影生千葉花成四柱塔象單留龕童雙舞

五言古

迎舍利

梁宣帝

釋迦稱散體多寶號金軀白玉誠非比黃金良莫踰變
見絕言象端異乃冥符靈知雖隱顯妙色豈榮枯惟當
千劫後方成無價珠

舍利佛

隋闕名

金繩界寶地珍木蔭瑤池雲間妙音奏天際法蠡吹

同馬太守聽九思法師講金剛經

唐高適

吾師晉陽寶傑出山河
寔途經世諦間心到空
王外鳴鐘山虎伏說法
天龍會了義同建瓴梵
法若吹籟深知億劫苦
善喻恒沙大捨施割肌膚
攀援去親愛招提何清
淨良牧駐輕蓋露冕衆
香中臨人覺苑內心持
佛印久標割魔軍退願
開初地因永奉彌天對

聽藍谿僧為元居士說維摩經

唐孟郊

古樹少枝葉真僧亦相依
山木自曲直道人無是非
手

持維摩偈心向居士歸空景忽開霽雪花猶在衣洗然
水谿畫寒物生光輝

久雨齋居誦經

宋朱子

端居獨無事聊披釋氏書暫釋塵累牽超然與道俱門
掩竹林幽禽鳴山雨餘了此無為法身心同晏如

慧日寺十八大阿羅塑像

明鄧韞

至人自藏珍古貌元氣備搏土造佛徒追真信難事亭
亭青蓮宇諸天奠其位尊者十二輩高座納雙屐巍巍

超凡表塵眼有矇視深厚貌漂山廣博欲際地靜沈馬
足萬專守門不二覺能越幾先慈欲放踵施龍驤以珠
豢虎跳以咒弭目瞑澄淵黑頂突華峯翠若真外形骸
能以理勝自嗒然了得喪何有立同異塵柄操瑩玉寶
花自空墜想當經營初其手空俗士我思彼尊者所造
亦深邃函經入方夏後乃道宏肆以空攝萬有以道獵
衆智窮山養枯骸野鳥習其髻善士瞻梵相瓶錫此焉
侍安得如此塑慰我懷古意

讀佛書

明 歸有光

天竺降靈聖利益其在此雪山真苦行九惱尚纏已非
徒食馬麥空鉢良可耻紛紛旃茶女謗論或未已不知
手指中猶出五獅子

七言古

附長短句

僧伽歌

唐 李白

真僧法號號僧伽有時與我論三車問言誦咒幾千遍
口道恒河沙復沙此僧本住南天竺為法頭陀來此國

戒得長天秋月明心如世上青蓮色意清淨貌稜稜亦
不減亦不增瓶裏千年舍利骨手中萬歲胡孫藤嗟余
落魄江淮久罕遇真僧說空有一言懺盡波羅夷再禮
渾除犯輕垢

題楊子文羅漢渡海圖

明張以寧

天台之東巨瀛海濛濛元氣浮無邊應真十六山中來
徑渡萬里蛟鼉淵巨靈前驅海若伏翠水帖帖開紅蓮
神螭猛獸競軒翥穹龜巨魚相後先一山浮玉當其前

石室古蘚垂千年異人高居役衆鬼
挽過巨浸如飈旋
貝宮神君迎且拜明星玉女爭
花妍陰風黯淡百怪集
天容旂影飛翩翩石橋迴望渺
何處紫翠明滅空雲煙
問渠飛錫何所往母乃驚嶺朝
金仙金仙雪山方晏坐
笑汝狡獪何紛然書生平生未
省見太息此畫人間傳
清時麟鳳在郊野白日杲杲行
青天

次韻張仲舉承旨題盧楞伽過海羅漢圖

明
僧來復

僧伽神變妙莫窮去住隱顯如旋風能令大海作平陸
超然獨脫閻浮中山君河伯備灑掃錫飛杯渡雲行空
安禪不避魔鬼窟受齋直入龍王宮文犀赤豹時作伍
玄猿白鹿日與同騰光噓氣閃奔雷天鼓震曜驚雷公
世人雖呵小乘法誰獨高舉隨雲龍我昔衡山問方廣
石橋每見馱經童天姝散花跪雙膝金盤笑捧明珠紅
開圖恍惚覩顏色山海遙隔精靈通那知畫者有深意
丹青巧奪造化功君不聞幻遊天地同旅泊我身安得

駕鶴從西東

五言律

和李澧州題常開州經藏詩

唐白居易

既悟蓮花藏須遺貝葉書菩提無處所文字本空虛觀
指非知月忘筌是得魚聞君登彼岸捨筏復何如

讀瑜珈論

宋僧惠洪

此生已無累一席可窮年細嚼寶公飯飽參彌勒禪懶
修精進定愛作吉祥眠夜久山空寂唯聞繞砌泉

七言律

予寫金剛經與王正道正道與朱少章復以詩

來輒次二公韻

金
宇文虛中

前世曾為粥飯僧此生隨處且騰騰經中因認人我相
教外都忘大小乘寫去欲云居士頌信來如續祖師燈
他年辱贈茅菴句誰謂因緣昔未曾

五言絕句

題雲際南峯眼上人讀經堂

唐
岑參

結宇題三藏焚香老一峯雲間獨坐卧只是對山松

七言絕句

聽僧雲端講經

唐賈島

無生深旨誠難解惟有師言得正真
遠近持齋來諦聽
酒坊魚市盡無人

龍門石佛

金劉中

鑿破蒼崖已失真又添行客眼中塵
請君看取他山石
不費工夫總法身

釋迦出山息軒畫

金完顏璫

龐着袖手出巖阿及至拈花事已訖千古雪山山下路
杖藜無處避藤蘿

蓮葉觀音恩禪師所藏同路宣叔賦

金元德明

瑞相分明一葉中華嚴性海共圓通補陀自有丹青變
畫史區區可得工

月伯明講經與玉山各賦二絕以寄

錄一

元 姚文真

玉笛飛空過洞庭
西山不改舊時青
短長橋下風雨夜
知是老龍來聽經

題羅漢圖

元 僧行端

諸諦空來世所無
神通百變絕名模
不知何處畱踪跡
却被人傳作畫圖

御定佩文齋詠物詩選卷二百三十三

欽定四庫全書

御定佩文齋詠物詩選卷二百三十四

僧類

五言古

赤谷安禪師塔

唐
盧照鄰

獨坐巖之曲悠然無俗氛酌酒呈丹桂思詩贈白雲煙
霞朝晚聚猿鳥歲時聞水華競秋色山翠含夕曛高談
十二部細覈五千文如如數冥昧生生理氤氳古人有

糟粕輪扁情未分且當事芝朮從吾所好云

還山貽湛法師

唐孟浩然

幼聞無生理常欲觀此身心跡罕兼遂崎嶇多在塵晚
途歸舊壑偶與支公鄰導以微妙法結為清淨因煩惱
業頓捨山林情轉殷朝來問疑義夕話得清真墨妙稱
古絕詞華驚世人禪房閉虛靜花藥連冬春平石藉琴
硯落泉灑衣巾欲知冥滅意朝夕海鷗馴

贈僧崖公

唐李白

昔在朗陵東學禪白看空大地了鏡徹迴旋寄輪風攬
彼造化力持為我神通晚謁太山君親見日沒雲中夜
卧山月拂衣逃人羣授余金仙道曠劫未始聞冥機發
天光獨朗謝垢氛虛舟不繫物觀化遊江濱江濱遇同
聲道崖乃僧英說法動海嶽遊方化公卿手秉玉麈尾
如登白樓亭微言注百川壘壘信可聽一風鼓羣有萬
籟各自鳴啟閉八窗牖託宿掣雷霆自言歷天台搏壁
躡翠屏凌兢石橋去恍惚入青冥昔往今來歸絕景無

不經何日更携手乘杯向蓬瀛

送通禪師還南陵隱靜寺

李白

我聞隱靜寺山水多竒蹤巖種朗公橋門深杯渡松道人制猛虎振錫還孤峯他日南陵下相期谷口逢

贈宣州靈源寺仲濬公

李白

敬亭白雲氣秀色連蒼梧下映雙谿水如天落鏡湖此中積龍象獨許濬公殊風韻逸江左文章動海隅觀心同水月解領得明珠今日逢支遁高談出有無

贈僧行融

李白

梁有湯惠休常從鮑照遊
我嗜史懷一獨暎陳公出卓
絕二道人結交鳳與麟
行融亦俊發吾知有英骨
海若不隱珠驪龍吐明月
大海乘虛舟隨波任安流
賦詩旃檀閣縱酒鸚鵡洲
待我適東越相攜上白樓

送恂上人還吳

唐儲光羲

洛城本天邑洛水即天池
君王旣行幸法子復來儀
虛室香花滿清川楊柳垂
乘閒道歸去遠意誰能知

贈霈禪師

唐 皇甫曾

南嶽滿湘源吾師經利涉身歸沃洲老名與支公接淨
教傳荆吳道緣正漁獵觀空色不染對鏡心自愜室中
人寂寞門外山稠疊天台積幽夢早晚當負笈

贈江華長老

唐 柳宗元

老僧道機熟默語心皆寂去歲別春陵汭流此投跡空
室無侍者巾屨唯挂壁一飯不願餘跣趺便終夕風窗
疎竹響露井寒松滴偶地即安居滿庭芳草積

夏日謁智遠禪師

唐孟郊

吾師當幾祖說法云無空禪心三界外宴坐天地中院
靜鬼神去身與草木同因知護王國滿鉢盛毒龍斗藪
塵埃衣謁師見真宗何必千萬劫瞬息去樊籠盛夏火
為日一堂十月風不得為弟子名姓掛儒宮

贈道月上人

孟郊

僧貌淨無點僧衣寧綴華尋常晝日行不使身影斜飯
未煑松柏坐山邀雲霞欲知禪隱高緝薜為袈裟

送清遠上人歸楚山舊寺

孟郊

波中出吳境霞際登楚岑
山寺一別來雲蘿三改陰
詩誇碧雲句道證青蓮心
應笑泛萍者不知松隱深

送元亮師

孟郊

蘭泉滌我襟杉月棲我心
茗啜綠淨花經誦清柔音
何處笑為別淡情愁不侵

送淡公

孟郊

江南邑中寺平地生勝山
開元吳語僧律韻高且閒
妙

樂谿岸平桂榜復往還樹石相鬪生紅綠各異顏風味
我遙憶新竒師獨攀

題道宗上人十韻

唐白居易

如來說偈讚菩薩著論議是故宗律師以詩為佛事一
音無差別四句有詮次欲使第一流皆知不二義精潔
沾戒體閒淡藏禪味從容恣語言縹緲離文字旁延邦
國彥上達王公貴先以詩句牽後令入佛智人多愛師
句我獨知師意不似休上人空多碧雲思

題天竺南院贈閒元旻清四上人

白居易

雜芳澗草合繁綠巖樹新山深景候晚四月有餘春竹
寺過微雨石徑無纖塵白衣一居士方袍四道人地異
佛國上人非俗交親城中山下別相送亦殷勤

贈別宣上人

白居易

上人處世界清淨何所似似彼白蓮花在水不著水性
真悟泡幻行潔離塵滓修道來幾時身心俱到此嗟予

牽世網不得長依止
離念與碧雲秋來朝夕起

梵天寺見僧守詮小詩清遠可愛次韻

宋

蘇軾

但聞煙外鐘不見煙中寺
幽人行未已草露濕芒屨
唯應山頭月夜夜照來去

送金山鄉僧歸蜀開堂

蘇軾

撞鐘浮玉山迎我三千指
眾中間磬款未語知鄉里
我非箇中人何以默識子
振衣忽歸去隻影千山裏
涪江

與中冷共此一味水冰盤薦琥珀何似糖霜美

送僧定觀歸

元黃清老

詩僧百丈來復作五臺別丁然振金錫桂子落秋雪山
空白雲閒風息萬籟滅相思何處無江湖一明月

賡僧韻

明太祖

天台五百尊方寸皆明月月影彌千江何曾有暫歇為
斯妙用通今古長不滅昔當懸挂時誠非凡可越住世
及應真幾度阿僧劫假錫作梯航泛海濤如雪一旦杳

無踪暫與沙門別，
儵忽羣禪中。
孰能為機世，
禪心曠無跡。
如海亦何竭，
僧本具他心。
宗門常合轍。

送僧歸越中

明王偁

錫挑龍河雲，
衣帶越谿雨。
說法方西來，
隨緣復東去。
松枝偃故房，
柏子落庭樹。
從此上方遙，
人間但凝佇。

吳中普門長老乞語

明楊循吉

普門在何處，
莫向海中尋。
只此吳城中，
便有紫竹林。
古以水與月，
而贊白衣士。
舉頭即見月，
掘地即得水。
撲哉。

明長老今往往普門濟度說已盡我復將何言雖然無
可言願且舉水月月在水中明此理分明說

答松上人過訪不值

明 吳鼎芳

孤踪石上雲飄忽本無住門外即青山一瓢向何處離
心寄春草柔艷欲飛去引領生白煙花落祇陀樹

清涼菴贈僧

明 范 洵

芒鞋定遠近天路臨蒼蒼結宇久未了種松新已長平
池託空影斷壁飛斜光欲問吾師法吾師法已忘

寒山訪雪谷師

明僧智舷

寒山太湖東六月雪埋塢時有天耳師巢居類巢父春
秋未半百氣骨自高古清泉凍連底蹲石怒獅虎此中
除梅花無物入巖戶

七言古

附長短句

別山僧

唐李白

何處名僧到水西乘舟弄月宿涇谿平明別我上山去
手攜金策踏雲梯騰身轉覺三天近舉足迴看萬嶺低

謔浪肯居支遁下風流還與遠公齊此度別離何日見
相思一夜暝猿啼

寄崇梵僧

唐王維

崇梵僧崇梵僧秋歸覆釜春不還落花啼鳥紛紛亂澗
戶山窗寂寂閒峽裏誰知有人事郡中遙望空雲山

偃師東與韓樽同詣景雲暉上人即事

唐岑參

山陰老僧解楞伽潁陽歸客遠相過煙深草濕昨夜雨

雨後秋風渡漕河空山終日塵事少平郊遠見行人小
尚書磧上黃昏鐘別駕渡頭一歸鳥

送鴻舉師遊江西

唐
劉禹錫

禪客學禪兼學文出山初似無心雲從風卷舒來何處
繚繞巴山不得去山州古寺好閒居讀盡龍王宮裏書
使君灘頭揀石硯白帝城邊尋野蔬忽然登高心瞥起
又欲浮杯信流水煙波浩淼魚鳥情東去三千三百里
荆門峽斷無盤渦湘平漢闊清光多廬山霧開見瀑布

西江月淨聞漁歌鍾陵八郡多名守半是西方社中友
與師相見便談空想得高齋獅子吼

支公詩

唐僧皎然

支公養馬復養鶴率性無羈多脫畧天生支公與凡異
凡情不到支公地得道由來天上仙為僧却下人間寺
道家諸子論自然此公唯許逍遙篇山陰詩友喧四座
佳句縱橫不廢禪

臘日遊孤山訪惠勤惠思二僧

宋蘇軾

天欲雪雲滿湖樓臺明滅山有無水清石出魚可數林
深無人鳥自呼臘日不歸對妻孥名尋道人實自娛道
人之居在何許寶雲山前路盤紆孤山孤絕誰肯廬道
人有道山不孤紙窗竹屋深自暖擁褐坐睡依團蒲天
寒路遠愁僕夫整駕催歸及未晡出山迴望雲木合但
見野鷗盤浮圖茲遊淡泊歡有餘到家恍如夢蘧蘧作
詩火急追亡逋清景一失後難摹

送林上人還杭

宋僧道潛

聚水作一雨多少近遠隨所遭或霑枯黃僅濡浹或入
巨海成波濤少林真風今百紀悵惜至此何蕭條喜君
齊志早寂寞同我十載淪芻樵含冲嗜漠不自厭更欲
刺口嘗羣餽師門祖席在在有得此失彼良自嘲竭來
東南走千里但願刈楚逢翹翹駛浮長川不憚惡陟彼
巨壑寧知勞誠專志苦若有相行斷西壤逢英豪金鉞
扣天元捷廓玉電激海明珠高星霜因循共千日誰爾

使子先行包湖山蜿蜒湖水薄湖上幽人想如昨秋入
芙蓉露已溥曉捲簾攏暑初却明明潭底見行雲謾謾
空中聞唳鶴此景從來吾已知異鄉寧羨君先歸由來
出處元無隔同看明朝日上時

題幻住菴中峯和尚蓮池野亭小像

明
陳秀民

亭前池水生蓮花亭中老禪方結跏雙枝作供淨瓶裏
彷彿玉井銜丹霞世上蓮花亦常有玉堂不比丹青手

水底水蠶已化龍絕世於今故無偶師是蓮花花是師
亭亭淨植澀不緇胸中五色舌上吐爛熳寫出蓮花詞
世間物物皆為幻我把斯圖作真看君不見中峯峰上
十丈蓮吹香夜夜到諸天

鐘上送僧歸衡山

明林鴻

上人孤閒似雲鶴十五出家住衡嶽說法能超寂上乘
持心不受羣疑縛世上誰知來去蹤南窺太華北遊嵩
衲經雁蕩千峯雪定入我嶠半夜鐘於今戒臘青松古

猶泛慈航到東土楊柳舟中九曲雲笈笠上三山雨
昨夜歸心繞楚天西風杖錫又茫然化龍潭畔清秋別
回雁峯頭舊日禪

送生明還雪竇

明僧智舷

殘月在松僧在戶犬聲如豹隔松塢霜厚如雪野易風
空邨家家門尚杜還山不問幾日程直造雲邊峰頂坐
莫想錢塘江北菴琉璃一點如螢火

五言律

送沙門弘景道俊玄奘還荊州應制

唐
李嶠

三乘歸淨域萬騎餞通莊
就日離亭近彌天別路長
荆南旋杖鉢渭北限津梁
何日紆真果還來入帝鄉

送沙門弘景道俊玄奘還荊州應制

唐
李乂

初日承歸旨秋風起贈言
漢珠畱道味江壁返真源地
出南關遠天迴北斗尊寧
知一柱觀却啟四禪門

陪李侍御訪聰上人禪居

唐孟浩然

欣逢柏臺友共謁聰公禪石室無人到繩牀見虎眠陰
崖常抱雪枯澗為生泉出處雖云異同懽在法筵

同崔興宗送衡嶽瓊公南歸

唐王維

言從石菌閣新下穆陵關獨向池陽去白雲留故山綻
衣秋日裏洗鉢古松間一施傳心法惟將戒定還

送王上人還襄陽

唐儲光羲

朝看法雲散知有至人還送客臨伊水行車出故關天

花滿南國精舍在空山雖復時來去中心長日閒

夏日過青龍寺謁操禪師

唐裴迪

安禪一室內左右竹亭幽有法知不染無言誰敢酬
鳥飛爭向夕蟬噪已先秋煩暑自茲適清源何處求

晚過盤石寺禮鄭和尚

唐岑參

暫詣高僧話來尋野寺孤岸花藏水碓谿竹映風爐
頂上巢新鵲衣中得舊珠談禪未得去輟櫂且踟躕

謁真諦寺禪師

唐杜甫

蘭若山高處煙霞障幾重凍泉依細石晴雪落長松問
法看詩妄觀身向酒慵未能割妻子卜宅近前峯

送靈澈上人歸嵩陽蘭若

唐
劉長卿

南地隨緣久東林幾歲空暮山門獨掩春草路難通作
梵連松韻焚香入桂叢唯將舊瓶鉢却寄白雲中

雲門寺訪靈一上人

劉長卿

所思勞日久惆悵去西東禪客知何在春山到處同獨
行殘雪裏相見白雲中請近東林寺窮年事遠公

秋夜肅公房喜普門上人自陽羨山至

劉長卿

山棲久不見林下偶同遊
早晚來香積何人住沃洲
寒禽驚後夜古木帶高秋
却入千峯去孤雲不可留

送方外上人之常州依蕭使君 劉長卿

宰臣思得度鷗鳥戀為羣
遠客迴飛錫空山卧白雲
夕陽孤艇去秋水兩谿分
歸共臨川史同翻貝葉文

送贇法師往上都

唐錢起

遠近化人天王城指日邊宰官迎說法童子伴隨緣到
處花為雨行時杖出泉今宵松月下門閉想安禪

送宏志上人歸湖州

唐李嘉祐

山林唯樂靜行住不妨禪高月穿松徑殘陽過水田詩
從宿世悟法為本師傳能使南人敬修持香火緣

送普門上人還陽羨

唐皇甫冉

花宮難久別道者憶千燈殘雪入林路深山歸寺僧日
光依嫩草泉響滴春冰何用求方便看心是一乘

題昭上人房

皇甫冉

沃洲傳教後百衲老空林
慮盡朝昏磬禪隨坐卧心
鶴飛湖草迴門掩海雲深
地與天台接中峯早晚尋

寄淨虛上人初至雲門

唐皇甫曾

寒蹤白雲裏法侶自提携
竹徑通城下松門隔水西
方同沃洲去不似武陵迷
髣髴心知處高峯是會稽

題贈吳門邕上人

皇甫曾

春山唯一室獨坐草萋萋
身寂心成道花閒鳥自啼
細

泉松徑裏迺景竹林西晚與門人別依依出虎谿

送少微上人東南遊

皇甫曾

石橋人不到獨往更迢迢
乞食山家少尋鐘野寺遙
松門風自掃瀑布雪難消
秋夜聞清楚餘音逐海潮

冬夕寄青龍寺源公

唐郎士元

歛屨入寒竹安禪過漏聲
高松殘子落深井凍痕生
罷磬風枝動懸燈雪屋明
何當招我宿乘月上方行

送少微上人遊蜀

唐盧綸

瓶鉢繞禪衣連宵宿翠微樹開巴水遠山曉蜀星稀徧
識中朝貴多諳外學非何當一傳付道侶願知歸

贈衡嶽隱禪師

唐李端

舊住衡州寺隨緣偶北來夜禪山雪下朝汲竹門開半
偈傳初盡羣生意未迴唯當與樵者杖錫入天台

贈海明上人

唐耿漳

來自西天竺持經奉紫微年深梵語變行苦俗流歸月
上安禪久苔生出院稀梁間有馴鴿不去復何依

喜入蘭陵望紫閣峯呈宣上人

唐
李益

雜草開三徑巢林喜一枝地寬留種竹泉淺欲開池紫閣當疎牖青松入壞籬從今安僻陋蕭相是吾師

贈蘭若僧

唐
于鵠

一身禪誦苦灑掃古花宮靜室門常閉深蘿夜不通懸燈喬木上鳴磬亂幡中附入高僧傳長稱二遠公

贈行脚僧

唐
戴叔倫

補衲隨緣住難維塵外蹤木杯能渡水鐵鉢肯降龍到
處棲雲榻何年卧雪峯知師歸日近應偃舊房松

送暎師歸本寺

唐 權德輿

還歸柳寺去遠遠出人羣苔甃桐花落山窗桂樹薰引
泉通絕澗放鶴入孤雲幸許宗雷到清談不易聞

送桃巖上人歸本寺

唐 嚴 維

長老歸緣起桃花憶舊巖清晨雲抱石深夜月籠杉道
具門人捧齋糧谷鳥銜餘生願依止文字欲三緘

送僧法和

唐戎昱

達士心無滯他鄉總是家
問經翻貝葉論法指蓮花
欲契真空義先開智慧芽
不知飛錫後何處是恒沙

送惟良上人

唐劉禹錫

窮巷惟秋草高僧獨叩門
相歡如舊識問法到無言
水為風生浪珠非塵可昏
悟來皆是道此別不消魂

秋日過瀉舉法師寺送歸江陵
劉禹錫

學畫長廊遍尋僧一徑幽
小池魚鶴淨古木帶蟬秋
客

至茶煙起禽歸講席收浮杯明日去相望水悠悠

送供奉定法師歸南安

唐 楊巨源

故鄉南越外萬里碧雲峯經論辭天去香花入海逢鷺
濤清梵徹蜃閣化城重心到長安陌交州後夜鐘

贈海東僧

唐 張 籍

別家行萬里自說過扶餘學得中州語能為外國書與
醫收海藻持咒取龍魚更問同來伴天台幾夏居

山中贈日南僧

張 籍

獨向雙峯老松門閉兩涯翻經上蕉葉挂袖落籐花甃
石新開井穿林自種茶時逢海南客蠻語問誰家

送閩僧

張籍

幾夏京城住今朝獨遠歸修行四分律護淨七條衣谿
寺黃橙熟沙田紫芋肥九龍潭上路同去客應稀

送無相禪師入關

唐章孝標

九衢車馬塵不染了空人暫舍中峯雪應看內殿春齋
心無外事定力見前身聖主方崇教深宜謁紫宸

寄白頭陀

唐白居易

近見頭陀伴云師老更慵性靈閒似鶴顏狀古於松山
裏猶難覓人間豈易逢仍聞移住處太白竄高峯

贈僧雲棲

唐張祜

麈尾與筇杖幾年離石壇梵餘林雪後碁罷嶽鐘殘開
卷喜先悟漱瓶知早寒衡陽寺前雁今日到長安

送僧遊溫州

唐朱慶餘

夏滿隨所適江湖非繫緣卷經離嶠寺隔葦上秋船水

落無風夜猿啼欲雨天石門期獨往謝守有遺篇

送僧

朱慶餘

客行皆有為師去是閒遊野望攜金策禪棲寄石樓山
深松翠冷潭靜菊花秋幾處題青壁袈裟濺瀑流

送僧歸天台

唐賈島

辭秦經越過歸寺海西峯石澗雙流水山門九里松曾
聞清禁漏却聽赤城鐘妙字研磨講應齊智者蹤

送僧遊衡嶽

賈島

心知衡嶽路不怕去人稀
船裏猶鳴磬谿頭自曝衣
有家從小別無寺不言歸
料得逢寒往當禪雪滿扉

送僧

賈島

大內曾持論天南化俗行
舊房山雪在春草嶽陽生
曉了蓮經義堪任寶蓋迎
王侯皆護法何寺講鐘鳴

寄無可上人

賈島

僻寺多高樹涼天憶重遊
磬過溝水盡月入草堂秋
穴蟻苔痕靜藏蟬柏葉稠
名山思徧往早晚到嵩丘

送天台僧

賈島

遠夢歸華頂，扁舟背嶽陽。
寒蔬修淨食，夜浪動禪牀。
雁過孤峯曉，猿啼一樹霜。
身心無別念，餘習在詩章。

送厲宗上人

賈島

擁策背岷峩，終南雨雪和。
漱泉秋鶴至，禪樹夜猿過。
高頂白雲盡，前山黃葉多。
會吟廬嶽上月，動九江波。

送去華法師

賈島

在越居何寺，東南水路歸。
秋江洗一鉢，寒日曬三衣。
默

聽鴻聲盡行看葉影飛囊中無寶貨船戶夜扃稀

贈然上人

唐周賀

竹庭瓶水新深稱北窗人講罷見黃葉詩成尋舊隣
錫陰迷坐石池影露齋身苦作南行約勞生始問津

奉寄安國大師兼簡子蒙

唐李商隱

憶奉蓮花坐兼聞貝葉經巖光分蠟屐澗響入銅瓶
日下徒推鶴天涯正對螢魚山羨曹植眷屬有文星

送太昱禪師

唐許渾

禪牀深竹裏心與徑山期結社多高客登壇盡小師早
秋歸寺遠新雨上灘遲別後江雲碧南齋一首詩

白馬寺不出院僧

許渾

禪心空已寂世路任多岐到院客長見閉關人不知寺
喧聽講絕廚遠送齋遲牆外洛陽道東西無盡時

贈僧

許渾

心法本無住流沙歸復來錫隨山鳥動經附海船回洗
足柳遮寺坐禪花委苔惟將一童子又欲上天台

送無夢道人先歸甘露寺

許渾

飄飄隨晚浪杯影入鷗羣
萍凍千船雪巖陰一寺雲
夜燈江北見寒磬水西聞
鶴嶺煙霞在歸期不羨君

寄西嶽白石僧

唐馬戴

挂錫中峯上經行蹋石梯
雲房出定後嶽月在池西
峭壁殘霞照欹松積雪齊
年年著山屐曾得到招提

寄終南真空禪師

馬戴

閒想白雲外了然清淨僧
松門山半寺雨夜佛前燈
此

境可長往浮生自不能一從林下別瀑布幾成冰

贈別空公

馬戴

雲門秋却入微徑久無人後夜中峯月空林百衲身寂
寥寒磬盡盪激瀑泉新履跡誰相見松風掃石塵

送禪師

唐薛能

寒空孤鳥度落日一僧歸近寺路聞梵出郊風滿衣步
搖瓶浪起盂憂磬聲微還坐棲禪所荒山月照扉

寄石橋僧

唐項斯

逢師入山日道在石橋邊
別後何人見秋來幾處禪
谿中雲隔寺夜半雪添泉
生有天台約知無却出綠

贈越僧嶽雲

唐 溫庭筠

世機消已盡中履亦飄然
一室故山月滿瓶秋澗泉
禪庵過微雪鄉寺隔寒煙
應共白蓮客相期松桂前

其二

蘭亭舊都講今日意如何
有樹開深院無塵到淺莎
僧居隨處好人事出門多
不及新春鳥年年鏡水波

秋宿詩僧雲英房因贈

唐杜荀鶴

賈島憐無可都緣數句詩君雖是後輩我謂過當時谿
浪和星動松陰帶鶴移同吟到明坐此道淡誰知

寄石湓清越上人

唐方干

寺處惟高僻雲生石枕前靜吟因得句獨夜不妨禪窗
接停猿樹巖飛浴鶴泉相思有書札俱倩獵人傳

贈江南僧

方干

忘機室亦空禪與沃洲同唯有半庭竹能生竟日風思

山海月上出定印香終繼後傳衣者還須立雪中

送鏡空上人遊江南

方干

去住如雲鶴飄然不可留何山逢後夏一食在孤舟
細雨蓮塘晚疎蟬橘岸秋應懷舊谿月夜過石窗流

題雪竇禪師

方干

飛泉濺禪石瓶注亦生苔海上山不淺天邊人自來
度年隨檜柏獨夜任風雷獵者聞疎磬知師入定回

題碧谿山禪老

方干

師步有雲隨師情唯鶴知
蘿迷收菜路雪隔出溪時
竹狄窺沙井巖禽停檜枝
由來傲卿相卧穩答書遲

贈瑪瑙山禪者

方干

芴草不停獸因師山更靈
邨林朝乞食風雨夜開扃
井味魚松粉雲根著淨瓶
塵勞如醉夢對此暫能醒

送日東僧遊天台

唐揚夔

一瓶離日外行指赤城中
去自重雲下來從積水東
攀蘿躋石徑挂錫憇松風
迴首鷄林道惟應夢想通

聞仰山禪師往曹谿因贈

唐張喬

曹谿松下路猿鳥重相親
四海求玄理千峯繞定身
異花天上墮靈草雪中春
自惜經行處焚香禮舊真

贈敬亭清越上人

張喬

海上獨隨緣歸來二十年
久閒時得句漸老不離禪
砌木欹臨水窗峰直倚天
猶期向雲裏別掃石牀眠

上柏梯寺懷舊僧

唐司空圖

雲根禪客居皆說舊吾廬
松日明金像苔龕響木魚
依

棲應不阻名利本來疎縱有人相問林間懶拆書

贈信美寺岑上人

司空圖

巡禮諸方遍湘南頻有緣焚香老山寺乞食向江船
紗碧籠名畫燈寒照淨禪我能來永日蓮漏滴寒泉

贈圓昉公

司空圖

天階讓紫衣冷格鶴猶卑道勝嫌名出身閒覺老遲晚
香延宿火寒磬度高枝每說長松寺他年與我期

送僧歸江東

唐崔塗

坐徹秦城夏行登越客船去留那有著語默不離禪葉
擁臨關路霞明近海天更尋同社侶應得虎溪邊

送僧歸天竺

崔塗

忽憶曾棲處千峯近沃洲別來秦樹老歸去海門秋汲
帶寒汀月禪鄰賈客舟遙知清興愜不厭石林幽

晚次修路僧

崔塗

平盡不平處尚嫌功未深應難將世路便得稱師心高
鳥下殘照白煙生遠林更聞清磬發聊喜緩塵襟

贈休糧僧

崔塗

聞鐘獨不齋何事更闕懷
靜少人過院閒從草上堦
生臺無鳥下石路有雲埋
為憶禪中舊時遊夢百崖

青龍寺贈雲顥法師

唐曹松

紫檀衣且香春殿日尤長
此地開新講何山鑠舊房
僧名喧北闕祖印續南方
莫惜青蓮喻秦人聽未忘

送德輝禪師

曹松

天涯緣事了又造石霜微
不以千峯險唯將獨影歸
有

為嫌假佛無境是真機到後流沙錫何時更有飛

貽住山僧

曹松

罷講巡巖塢無窮得野情臘高猶伴鹿夏滿不歸城雲
朶綠崖發峯陰截水清自然雙洗耳惟任白毫生

寄崇聖寺僧

曹松

不醉秦中酒冥心只似師望山吟過日伴鶴立多時溝
遠流聲細林寒綠色遲菴西蘿月夕重得語空期

送雲卿上人遊安南

唐李洞

春往海南邊
秋聞半夜禪
鯨吞洗鉢水
犀觸點燈船
島嶼分諸國
星河共一天
長安却回日
松偃舊房前

送遠上人

李洞

海嶽兩無邊
去來都偶然
齒因吟後冷
心向靜中圓
蟲網花間井
鴻鳴雨後天
葉書歸舊寺
應附載鐘船

錦城秋寄懷宏播上人

李洞

極頂雲兼凍
孤城露洗初
共辭嵩少雪
久絕貝多書
遠照雁行細
寒條狹挂虛
分泉煎月色
憶就茗林居

寄太白禪師

唐張翊

何年萬仞頂獨有坐禪僧
客上應無路人傳或見燈齋
廚惟有椽講石任生藤
遙想東林社如師誰復能

贈可論上人

張翊

師教本於空流來不自東
修從多劫後行出衆人中
衲冷湖山雨幡輕海甸風
遊吳累夏講還與虎谿同

贈著上人

唐唐球

掩門江上住盡日更無為
古木坐禪處殘星鳴磬時
水

澆水滴珠數落纍纍自有閒行伴青藤杖一枝

寄楚瓊上人

唐李咸用

遙知無事日靜對五峯秋鳥隔寒煙語泉和夕照流凭
欄疎磬盡瞑目遠雲收幾句出人意風高白雪浮

雲居長老

唐王貞白

巖路躡雲上來叅出世僧松高半巖雪竹覆一谿冰不
說有為法非傳無盡燈了然方寸內應祇見南能

訪澄上人

唐李中

尋師來靜境神骨覺清涼
一餉逢秋雨相留坐竹堂
石渠堆敗葉莎砌咽寒螿
話到南能旨怡然萬慮忘

寄暹上人

唐孟貫

聞罷城中講來安頂上禪
夜燈明石室清磬出巖泉
欲訪慙多事相辭恨隔年
終期息塵慮接話虎谿邊

送僧歸富春

唐鄭巢

憶過僧禪處遙山抱竹門
古房闕蘚色秋徑掃潮痕
石靜聞泉落沙寒見鶴翻
終當從此望更與道人言

送琇上人

鄭巢

古殿焚香外清羸坐石稜
茶煙開瓦雪鶴跡上潭水
孤磬侵雲動靈山隔水登
白雲歸意遠舊寺在廬陵

贈蠻僧

鄭巢

南海何年過中林一磬微
病逢秋雨發心逐暮潮歸
久卧前山寺猶縫故國衣
近來慵步履石蘚滿柴扉

懷贈操禪師

唐李建勳

嘗隱曹谿子龕居面碧嵩
杉松新夏後雨電夜禪中
道

匪因經悟心能向物空秋來得音信又在剡山東

贈幻羣法師

唐僧清塞

北京從別後南越幾聽砧住久白髭出講長黃葉深香
連鄰舍像磬徹遠巢禽寂寞應關道何人見此心

送秘上人遊京

唐僧皎然

共君方異路山伴與誰同日冷行人少時清古鎮空暖
瓶和雪水鳴錫帶江風撩亂終南色遙應入夢中

贈圭峯禪師

唐僧無可

絕壑禪牀底泉分落石層霧交高頂草雲隱下方燈朝
滿傾心客谿連學道僧半旬持一食此事有誰能

送僧遊西域

唐僧處默

一盂兼一錫祇此度流沙野性難為客禪心即是家寺
投雲嶠雪路入曉天霞自說遊諸國回應歲月賒

寧公新拜首座因贈

宋王禹偁

著書新奏御優詔及禪扉首座名雖貴家山老未歸磬
聲寒繞枕塔影靜侵衣終憶西湖上秋風白鳥飛

僧可真東歸因謁范蘇州

宋梅堯臣

姑蘇臺畔去雲壑付清機野策過寒水山童護衲衣松
門正投宿竹笠帶餘暉誰愛杼山句使君應姓韋

送長吉上人

宋林逋

囊集暮雲篇行行肯廢禪青山買未暇朱闕去隨緣茗
試幽人井香焚賈客船淮流遲新月吟玩想忘眠

送思齋上人之宣城

林逋

林嶺藹春暉程程入翠微泉聲落坐石花氣上行衣詩

正情懷淡禪高語論稀蕭閒水西寺駐錫莫忘歸

寄清曉閣黎

林逋

前時春雪晴林壑趣彌清幾憶山陰講兼忘谷口耕樹
叢歸夕鳥湖影浸寒城還肯重相訪柴門掩杜蘅

寄楞嚴大師

宋文同

錦官城裏寺一室若雲峯水縮秋吟鼎霜低夜講松住
齋塵入鉢出定蘚生筇曾聽三摩義居常夢曉鐘

贈勝上人

宋葉適

近日能吟者黃巖說勝師語生兼老筆體重帶幽姿遣
臘冰千筋勾春柳一絲方山竄高頂不擬到茅茨

寄開元奎律師

元
表
楠

開元古壇主老至律精嚴洗鉢魚游水開門鶴入簾拾
薪供茗具滴露寫經籤已悟如來意看花不用拈

寄中山隱講師

元
張
憲

問訊山中隱中山第幾重風廊巡夜虎雲鉢聽經龍流
水千谿月寒巖一樹松無因淨查滓來共上堂鐘

送僧

元倪瓚

聞說四明道山川似若邪去依阿育塔還宿梵王家野
井封殘雪江船聚晚沙光公強健否持底作生涯

擬寒山子

元僧行端

偃仰千巖內超然與世違采芝為口食紉樹作身衣瀑
水淋苔磴湫雲漬草扉閒吟竺仙偈幾度歷斜暉

送思上人

明徐賁

一瓶與一錫遊越復遊吳到寺長逢舊看山每過湖飯

緣隨處有法意本來無南地多猿鳥還驚梵語殊

贈虛中上人

徐貴

歸去東林寺行循曲澗流餘燈因佛在宿飯為猿留竹
屋煙迎夕菱池雨送秋還叅衆師舊一一話曾遊

憶山中舊遊贈坦師

明張適

中峯舊名刹每到竟忘還泉瀉巖千摺雲分屋半間松
枯知寺古田少覺僧閒師去因懷古詩成未解顏

春日訪大林和尚

明皇甫訪

投跡入空境者心愧此身縮中蒙示結執鏡為宣因石
壁初消雪筠闕久滅塵坐來花落盡猶自不知春

觀音巖贈僧

明童珮

問道祝融東逢僧是遠公林間孤殿破石下半潭空雲
影戀苔綠山光借樹紅翻經對靈鷲日日鳥聲中

訪天聖寺長老

明吳孺子

吳興天聖寺長老有餘工種藥寒雲外分泉杳靄中看
心孤月滿照影萬緣空我是陶元亮常來訪遠公

同聞上人作

明程嘉燧

旬月擬來此同遊亦偶然
經行適多暇喧寂自俱禪
出寺半峯雨歸房終夜泉
獨慙心住著仍是愛幽偏

送僧還松蘿山

明僧德祥

鄉井何曾念谿山不肯忘
百灘春水色萬壑古松香
雲影同歸路鐘聲出上方
松蘿最深處閒坐閱流光

送鄰寺僧

僧德祥

同住南山裏經年不一逢
深蘿挂靈錫落葉闕行踪
夢

繞千峯澗吟殘兩寺鐘
今從湖上別雲水意重重

贈別華頂老僧

明僧圓復

老宿清無侶
名山住有年
鬚留三寸雪
衲挂半窗煙
破屋眠秋雨
孤鐺煮夜泉
相逢笑相別
紅葉滿霜天

老僧

明僧照源

早得安心法
柴門豈浪開
髮長難剪雪
衣故不容埃
屈指僧中臘
尋思雲外來
恐傷蟲蟻樂
常誠坐莓苔

七言律

留別公安太易沙門

唐 杜甫

隱居欲就廬山遠，麗藻初逢休上人。
數問舟航畱製作，長開篋笥擬心神。
沙邨白雪仍含凍，江縣紅梅已放春。
先蹋廬峯置蘭若，徐飛錫杖出風塵。

寄廬山真人

唐 李端

高僧無跡本難尋，更得禪行去轉深。
青草湖中看五老，白雲山上宿雙林。
月明潭色澄空性，夜靜猿聲證道心。
更說謝公南座好，煙蘿到地幾重陰。

贈衡嶽隱禪師

唐司空曙

擁褐安居南嶽頭，白雲高寺見衡州。
石窗湖水搖寒月，楓樹猿聲報夜秋。
講席舊逢山鳥至，梵經初向竺僧求。
自知身老將傳法，因下人間遂此遊。

送義舟師却還黔南

唐劉禹錫

黔江秋水浸雲霓，獨汎慈航路不迷。
猿狖窺齋林葉動，蛟龍聞咒浪花低。
如蓮半偈心常悟，問菊新詩手自攜。
常說摩圍似靈鷲，却將山屐上丹梯。

贈日本僧智藏

劉禹錫

浮杯萬里過滄溟
遍禮名山適性靈
深夜降龍潭水黑
新秋放鶴野田青
身無彼我那懷土
心會真如不讀經
為問中華學道者
幾人雄猛得寧馨

贈草堂宗密上人

唐白居易

吾師道與佛相應
念念無為法法能
口藏宣傳十二部
心臺照耀百千燈
盡離文字非中道
長住虛空是小乘
少有人知菩薩行
世間只是重高僧

贈黃蘗山僧希運

唐裴休

自從大士傳心印，額上圓珠七尺身。
掛錫十年棲蜀水，浮杯今日渡漳濱。
一千龍象隨高步，萬里香花結勝因。
擬欲事師為弟子，不知將法付何人。

贈閒師

唐許渾

近日高僧更有誰，宛陵山下遇閒師。
東林共許三乘學，南國爭傳五字詩。
初到庾樓紅葉墜，夜投蕭寺碧雲隨。
秋江莫惜題佳句，正好磷磷見底時。

贈南嶽僧

唐李遠

曾住衡陽嶽寺邊，門開江水與雲連。
數州城郭藏寒樹，一片風帆著遠天。
猿去不離行道處，客來皆到卧牀前。
今朝惆悵紅塵裏，惟憶閒塘盡日眠。

送僧歸廬山

唐趙嘏

禪棲忽憶五峯遊，去著方袍謝列侯。
經啟樓臺千葉曙，錫含風雨一枝秋。
題詩片月侵雲在，洗鉢香泉覆菊流。
却憶前年別師處，馬嘶殘月虎谿頭。

贈天卿寺神亮上人

趙嘏

五看春盡此江濱
花自零風日自曛
空有慈悲隨物念
已無踪跡在人羣
迎秋月色簷前見
入夜鐘聲竹外聞
笑指白蓮心自得
世間煩惱是浮雲

寄清涼寺僧

唐
溫庭筠

石路無塵竹徑開
昔年曾伴戴顓來
窗間半偈聞鐘後
松下殘碁送客回
簾向玉峯藏夜雪
砌因藍水長秋苔
白蓮社裏如相問
為說遊人是姓雷

送僧歸國清寺

唐杜荀鶴

吟送越僧歸海涯僧行渾不覺程賒
路沿山脚潮痕出
睡倚松根日色斜
撼錫度岡猿抱樹挈瓶盛浪鷺翹沙
到叅禪後知無事看引秋泉灌藕花

留別復本修古二上人

唐劉滄

二遠相知是昔年此身長寄禮香煙
綠蕪風晚水邊寺
清磬月高林下禪
臺殿虛窗山翠入梧桐疎葉露光懸
西峯話別又須去終日關山在馬前

和題支山南峯僧次韻

唐
陸龜蒙

看臺霜細欲垂肩
自說初棲海嶽年
萬壑煙霞秋後到
一林風雨夜深禪
時翻貝葉添新藏
閒插松枝護小泉
好是清冬無外事
匡牀齋罷向陽眠

送圓載上人歸日本國

唐
皮日休

講殿談餘著賜衣
椰帆却返舊禪扉
貝多紙上經文動
如意瓶中佛爪飛
颶母影邊持戒宿
波神宮裏受齋歸
家山到日將何入
白象新秋十二圍

訪寂上人不過

皮日休

何意尋雲暫廢禪客來還寄草堂眠
桂寒自落翻經案石冷空消洗鉢泉
爐裏尚飄殘玉篆龕中仍鑱小金仙
須將二百籤迴去待得支公恐隔年

送圓載上人歸日本

唐顏萱

師來一世恣經行却向滄溟問去程
心靜已能防渴鹿聲喧時為駭長鯨
禪林幾結金桃重梵室重修鐵瓦輕
料得還鄉無別利只應先見日華生

江西逢僧省文

唐曹松

高僧不負雪峯期，却伴青霞入翠微。
百葉巖前霜欲降，九枝松上鶴初歸。
風生碧澗魚龍躍，錫振金樓燕雀飛。
想得白蓮花上月，滿山猶帶舊光輝。

寄僧

唐吳融

柳拂池光一點清，紫方袍袖杖藜行。
偶傳新句來中禁，誰把閒書寄上卿。
錫倚山根重，蘚破碁敲石面碎。
雲生應憐正視淮王詔，不識東林物外情。

寄淮海惠澤上人

唐李洞

海濤痕滿舊征衣，長憶初程宿翠微。
竹裏橋鳴知馬過，塔中燈露見鴻飛。
看毫別後應盈尺，巖木居來定幾圍。
他日願師容一榻，煎茶掃地學忘機。

送僧

唐黃滔

纔年七歲便從師，猶說辭家學佛遲。
新斲松蘿還不住，愛尋雲水擬何之。
孤谿雪滿維舟夜，疊嶂猿啼過寺時。
鳥道龍湫悉行後，豈將翻譯負心期。

聞尚顏上人創居有寄

唐僧齊已

麓山南面橘洲西，別構新齋與竹齊。
野客已聞將鶴贈，江僧未說有詩題。
窗臨香靄雲千嶂，枕逼潺湲月一谿。
可想乍移吟榻處，松陰冷濕薜新泥。

贈詩僧道通

宋蘇軾

雄豪而妙苦而腴，祇有琴聰與蜜殊。
語帶煙霞從古少，氣含蔬筍到公無。
香林乍喜聞蒼筍，古井唯慙斷轆轤。
為報韓公莫輕許，從今島可是詩奴。

贈從善上人

宋 徐照

骨氣清冷無片塵，即應僧可是前身。
詩因圓解堪呈佛，碁與禪通可悟人。
掃地就涼松日少，煮茶消困石泉新。
不能來往城中寺，去買青山約我鄰。

照閣奉陪辯才老師夜坐懷少游學士

宋 僧道潛

猿鳥投林已寂然，芭蕉過雨小樓前。
雲依絕壁中間破，月自遙峯缺處圓。
照坐不須紅蠟炬，可人惟有蕙爐煙。

校酬御府圖書客疇昔還同此夜禪

訪箕和尚峴山

金許古

山中風定夜沈沈
月滿禪牀靜客心
蒼檜四排嚴法界
孤松中立殷潮音
鼓鐘有節人如玉
臺殿無塵地布金
二月來遊春尚淺
紅梅無數照山陰

寄開元奎律師

元表楠

雙塔亭亭透夕陽
芭蕉深處碧窗涼
江神夜聽光明偈
天女朝分解脫香
齋鉢午空烏守樹
經臺雲冷鶴歸房

平生欲結西方社，侶怪淵明作吏忙。

贈星上人歸湘中

元虞集

潭北湘南無影樹，一花吹度海門潮。
天香滿室定初起，雲氣上衣身欲飄。
寶月夜寒龍在鉢，銀河秋近鵲成橋。
豈無一箇邛州竹，與爾松根共寂寥。

越僧無涯號棲雲乞賦

元張翥

上方何處但聞鐘，深護林扉翠幾重。
卧冷衲衣侵片石，行隨錫杖度千峯。
松晴每下安巢鶴，潭暮時畱聽法龍。

更欲移禪沃洲去微茫巖洞不曾封

答復見心長老見寄

元 周伯琦

浙水東頭佛舍連蒲菴上士坐忘年五雲古衲層瀾湧
百寶浮圖列宿躔牀上貝書多譯梵門前海舶直通燕
比丘喜得階蘭秀應種菩提滿法田

奉寄恕中韞禪師

元 丁鶴年

曾向名山識異人心如木石氣如春坐禪霜葉秋埋膝
行道天花日繞身有鉢相傳元是幻無錐可卓本非貧

惟餘潭底中秋月對寫龍峯面目真

送僧還天台省親

明張羽

載經東去路迢迢應為寧親到石橋江上中齋尋午墅
沙邊夜梵雜寒潮宰官問法留三宿慈母焚香製七條
歲晚定知歸本寺待予聽雪坐終宵

寄南屏涓長老

張羽

蒲室傳心第一宗老尋古剎寄行踪貫花偈就人爭寫
壞色衣穿白嬾縫案上梵經皆貝葉手中談麈是青松

何年惠遠重開社來聽東林寺裏鐘

越中送僧還舊山

明王野

折柳插瓶溪水灣此方緣盡又思還
春花乞食雲門寺秋葉翻經瓦屋山
雲起珠林封舊跡月臨寶地憶慈顏
知君身是梅檀樹已去畱春梵宇間

次韻懷冷泉禪師

明僧守仁

八年京國雁書沈每見遊僧問好音
已喜法支流日本賸傳詩價到鷄林
馬嘶赤撥晨朝散花落糴穠午定深

今雨不來春又暮
鷺峯煙樹綠成陰

贈住菴僧

明僧雪梅

垂簾清晝篆煙霞
滿地蒼苔襯落花
習寂不須天送供
圖閒嬾為客煎茶
寒爐煨芋留殘火
怪衲連雲綴斷麻
兀坐不知天早晚
月移松影上窗紗

五言絕句

湖上別鑒上人

唐宋之問

願與道林近在意
逍遙篇自有靈
佳寺何用沃洲禪

別東林寺僧

唐李白

東林送客處月出白猿啼笑別廬山遠何煩過虎谿

送靈澈上人

唐劉長卿

蒼蒼竹林寺杳杳鐘聲晚荷笠帶夕陽青山獨歸遠

送方外上人

劉長卿

孤雲將野鶴豈向人間住莫買沃洲山時人已知處

寄燦師

唐韋應物

林院生夜色西廊上紗燈時憶長松下獨坐一山僧

望南山雪懷山寺普上人

唐皇甫冉

夜夜夢蓮宮無由見遠公朝來出門望知在雪山中

送僧遊春

唐李端

獨將支遁去欲往戴顓家晴野人臨水春山樹發花

宿山中僧

唐顧況

不爇香爐煙蒲團坐如鐵常想同夜禪風墮松頂雪

酬師問

唐劉商

虛空無處所髣髴似琉璃詩境何人到禪心又過詩

李韶州書論釋氏州有能公遺跡詩以問之

唐
權德輿

常日區中暇時聞象外言曹谿有宗旨一為勸心源

贈苦行僧

唐
雍裕之

幽深紅葉寺清淨白毫僧古殿長鳴磬低頭禮畫燈

和鄭相公尋宣上人不過

唐
楊巨源

方尋蓮境去又值竹房空幾韻飄寒玉餘清不在風

贈建業契公

唐
孟郊

師住青山寺清華常遶身雖然到城郭衣上不棲塵

寄西峯僧

唐張籍

松暗水涓涓夜涼人未眠西峯月猶在遙憶草堂前

禪師

張籍

獨在西峯頂年年閉石房家中無子弟人到為焚香

贈禪師

唐張祜

坐見三生事宗傳一衲來已知無法說心向定中灰

贈空禪師

唐喻鳧

虎見修行久松知夏臘高寒堂坐風雨瞑目尚波濤

懷無可上人

唐
雍陶

山寺秋晴後僧家夏滿時清涼多古蹟幾處有新詩

與僧

唐
韓偓

江海扁舟客雲山一衲僧相逢兩無語若箇是南能

訪僧不遇

唐
崔道融

尋僧已寂寞林下鎖山房松竹雖無語牽衣借晚涼

寄僧知乾

唐
裴說

貌高清入骨帝里舊臨壇出語經相似行心佛證安

寄融上人

唐僧皎然

常愛西林寺池中月在時芭蕉一片葉書取寄吾師

僧

金李俊民

貌與松俱瘦心將絮共沾一庵空寂地香火讀楞嚴

禪窩

明謝徽

陰壑寒猶闕空山響已沈白雲無路入禪向定中深

七言絕句

縣內閒居贈溫公

唐
韋應物

滿郭春風嵐已昏，鴉啼吏散掩重門。
雖居世網常清淨，夜對高僧無一言。

贈僧

唐
顧况

家住義興東舍谿，谿邊莎草雨無泥。
上人一向心入定，春鳥年年空自啼。

贈天竺靈隱二寺主

唐
權德輿

石路泉流兩寺分，尋常鐘磬隔山聞。
山僧半在中峯住，

共占清猿與白雲

贈廣通上人

權德輿

身隨猿鳥在深山
早有詩名到世間
客至上方留盃漱
龍泓洞水晝潺潺

贈藥山高僧惟儼之作

唐李翱

練得身形似鶴形
千株松下兩函經
我來問道無餘說
雲在青天水在瓶

再贈

李翱

選得幽居愜野情終年無送亦無迎
有時直上孤峯頂
月下披雲笑一聲

贈華嚴院僧

唐張籍

一身依止荒閒院燭耀窗中有宿煙
徧禮法華經裏字
不曾行到寺門前

題清頭陀

唐白居易

頭陀獨宿寺西峯百尺禪庵半夜鐘
烟月蒼蒼風瑟瑟
更無雜樹對山松

送僧遊山

唐熊孺登

雲身自在山山去何處
靈山不是歸日暮寒林投古寺
雪花飛滿水田衣

送僧遊天台

唐鮑溶

金嶺雪晴僧獨歸
水文霞采衲禪衣
可憐石室燒香夜
江月對心無是非

秋夜懷紫閣寺僧

鮑溶

滿山雨色應難見
隔澗經聲又不聞
紫閣夜深多入定

石臺誰為掃秋雲

尋僧

唐
朱慶餘

吟背春城出草遲
天晴紫閣赴僧期
山邊樹下行人少
一派新泉日午時

別臻師

唐
李商隱

昔去靈山非拂席
今來滄海欲求珠
楞伽頂上清涼地
善眼仙人憶我無

華師

李商隱

孤鶴不睡雲無心
衲衣筇杖來西林
院門晝鎖迴廊靜
秋日當階柿葉陰

同崔八詣藥山訪融禪師

李商隱

共受征南不次恩
報恩唯是有忘言
巖花澗草西林路
未見高僧只見猿

大夢上人自廬峯回

唐杜牧

行脚尋常到寺稀
一枝藜杖一禪衣
開門滿院空秋色
新向爐峯過夏歸

贈終南蘭若僧

杜牧

北闕南山是故鄉
兩枝仙桂一時芳
休公都不知名姓
始覺禪門氣味長

寄敬上人

唐許渾

萬山秋雨水縈迴
紅葉多從紫閣來
雲冷竹齋禪衲薄
已應飛錫過天台

送僧

唐馬戴

親在平陽久憶歸
洪河雨漲出關遲
獨過舊寺人稀識

一一杉松老別時

其二

龕中破衲自持行
樹下禪牀坐一生
來往白雲知歲久
滿山猿鳥會經聲

秋日送僧志幽歸山寺

馬戴

禪室繩牀在翠微
松間荷笠一僧歸
磬聲寂歷宜秋夜
手冷鐙前自衲衣

尋僧

唐趙嘏

谿戶無人谷鳥飛石橋橫木挂禪衣看雲日暮倚松立
野水亂鳴僧未歸

贈質上人

唐杜荀鶴

枿坐雲遊出世塵兼無瓦鉢可隨身逢人不說人間事
便是人間無事人

山僧

唐陸龜蒙

山薜幾重生草履澗泉長自滿銅鉞時將如意敲眠虎
遣向林間坐聽經

其二

一夏不離蒼島上秋來頻話石城南
思歸瀑布聲前坐却把松枝拂舊庵

贈老僧

陸龜蒙

枯貌自同霜裏木餘生唯指佛前燈
少時寫得坐禪影今見問人何處僧

其二

自有山家供衲線不離谿曲取庵茅
舊曾聞說林中鳥

定後常來頂上巢

訪僧不遇

唐 陸龜蒙

棹倚東林欲問禪
遠公飛錫未應還
蒙莊弟子相看笑
何事空門亦有關

贈日東鑒禪師

唐 鄭谷

故國無心渡海潮
老禪方丈倚中條
夜深雨絕松堂靜
一點山螢照寂寥

江西逢僧省文

唐 曹松

閩地高僧楚地逢
伴遊蠻錫挂垂松
白雲逸性都無定
纔出雙峯愛五峯

贈青龍印禪師

唐李洞

雨澀秋刀剃雪時
菴前曾禮草堂師
居人昨日相過說
竊已生孫竹滿池

送僧清演歸山

李洞

毛褐斜肩背負經
曉思吟入竇山青
峯前野水橫官道
踏著秋天三四星

贈僧

李洞

不羨王公與貴人，唯將雲鶴自相親。
閒來石上觀流水，欲洗禪衣未有塵。

雪竇禪師

唐崔道融

雪竇峯前一派懸，雪竇五月無炎天。
客塵半日灑欲盡，師到白頭林下禪。

贈念法華經綬上人

唐李中

五更初起掃松堂，瞑目先焚一炷香。
念徹蓮經誰得見

千峯巖外曉蒼蒼

訪章禪老

李中

比尋禪客叩禪機
澄却心如月在池
松下偶然醒一夢
却成無語問吾師

送僧歸南嶽

唐僧清塞

草履初登南客船
銅瓶猶貯北山泉
衡陽舊寺秋歸後
門鎖寒潭幾樹蟬

奉和武功學士舍人寄贈文懿大師

宋徐鉉

已潔心源超世表却緣詩句有時名初聞行業如耆宿
及見容顏是後生

贈東林總長老

宋蘇軾

谿聲便是廣長舌山色豈非清淨身夜來八萬四千偈
他日如何舉似人

示西林可師

宋朱子

幽居四畔只空林啼鳥落花春意深獨宿塵龕無夢寐

五更山月照寒衾

山中僧

元宋无

雪頂霜眉齒半稀
跣趺苔石看雲歸
山童掃葉鶴飛起
狼籍松花滿衲衣

憶原上人

明劉績

一兩棕鞋八尺藤
廣陵行遍又金陵
不知竹雨松風夜
吟對秋山那寺燈

和寒山子詩

明陳芹

青煙紫霧夕冥冥似雨飛泉滿戶庭白日山人無一事
水晶簾下閱金經

寄曦春谷講師

明僧德祥

有德高僧亦有年少曾行到寺門前尋常獨看華嚴處
十二時中栢子煙



御定佩文齋詠物詩選卷二百三十四

欽定四庫全書

集部

御定佩文齋詠物詩選卷二百三十五

七

詳校官侍郎_臣李封

主事銜_臣徐以坤覆勘

總校官檢討_臣何思鈞

校對官典簿_臣郭祚熾

謄錄監生_臣李璜

欽定四庫全書

御定佩文齋詠物詩選卷二百三十五

浮圖類

五言古

和從駕登雲居寺塔

北周庾信

重巒千仞塔危磴九層臺石關恒逆上山梁乍斗迴塔
下雲峯出窗前風洞開隔嶺鐘聲度中天梵響來平時
欣侍從於此暫徘徊

奉和同泰寺浮圖

庾信

宮宮凌太清照殿比東京長影臨雙闕高層出九城拱
積行雲礙幡搖度鳥驚鳳飛如始泊蓮合似初生輪重
對月滿鐸韻擬鸞聲畫水流全住圖雲色半輕露晚盤
猶滴珠朝火更明雖連博望苑還接銀沙城天香下桂
殿仙梵入伊笙庶聞八解樂方遣六塵情

登揚州西巖寺塔

唐
劉長卿

北塔凌空虛雄觀壓川澤亭亭楚雲外千里看不隔遙

對黃金臺浮輝亂相射盤梯接元氣半壁棲夜魄稍登
諸劫盡若騁排霄翮向是滄洲人已為青雲客雨飛千
拱霽日在萬家夕鳥處高却低天涯遠如迫江流入空
翠海嶠見微碧向暮期不來誰堪復行役

七言古

惠雲塔

明
程本立

老禪西來兜率宮金曇舍利開芙蓉平地起作寶光相
七級上凌天九重摩泥頂珠現宮碧丹霞掩映雞足峯

八窗玲瓏懸皎月層欄翠滑扶神龍我欲乘虛求帝釋
雲梯高峻紅塵隔簷鈴停語寂籟冷白鶴飛下蒼煙夕

五言律

奉和九月九日登慈恩寺浮圖應制

唐
李適

鳳輦乘朝霽鸚林對晚秋天文貝葉寫聖澤菊花浮塔
似神功造龕疑佛影留幸陪清漢蹕欣奉淨居遊

奉和九月九日登慈恩寺浮圖應制

唐
趙彥昭

出豫乘秋節登高陟梵宮
皇心滿塵界佛迹現虛空
日月宜長壽人天得大通
喜聞題寶偈受記莫由同

奉和九月九日登慈恩寺浮圖應制

唐
楊庶

萬乘臨真境重陽眺遠空
慈雲浮雁塔定水映龍宮
寶鐸含飈響仙輪帶日紅
天文將瑞色輝煥滿寰中

登棲靈寺塔

唐
蔣渙

三休尋磴道九折步雲霓
瀍澗臨江北郊原極海西
沙平瓜步出樹遠綠楊低
南指晴天外青峯是會稽

登慈恩寺塔

唐張喬

窗戶響層風清涼碧落中
世人來往別煙景古今同
列岫橫秦斷長河極塞空
斜陽越鄉思天末見歸鴻

保叔塔

元錢惟善

金刹天開畫鐵檐風語鈴
野雲秋共白江樹晚逾青
鑿屋巖藏雨黏崖石墜星
下看湖上客歌吹正沈冥

報恩寺塔

明蔡汝楠

寶塔中天構君王奠鎬年
皇圖香界合海氣鳳樓懸
萬嶺開江左千門倚日邊
南山留作鎮長見法輪圓

五言排律

登總持寺浮圖

唐孟浩然

半空躋寶塔晴望盡京華
竹遶渭川遍山連上苑斜
四門開帝宅阡陌俯人家
累劫從初地為童憶聚沙
一窺功德見彌蓋道心加
坐覺諸天近空香送落花

秋日登揚州西靈塔

唐李白

寶塔凌蒼蒼，登攀覽四荒。
頂高元氣合，標出海雲長。
萬象分空界，三天接畫梁。
水搖金刹影，日動火珠光。
鳥拂瓊簾度，霞連繡拱張。
目隨征路斷，心逐去帆揚。
露浴梧楸白，霜催橘柚黃。
玉毫如可見，於此照迷方。

七言律

題慈恩寺浮圖

唐章八元

十層突兀在虛空，四十門開面面風。
却怪鳥飛平地上

自驚人語半天中
迴梯暗踏如穿洞
絕頂初攀似出籠
落日鳳城佳氣合
滿城春樹雨濛濛

題雁塔

唐許孜

寶輪金地壓人寰
獨坐蒼冥啟玉關
北嶺風煙開魏闕
南山氣象鎖商顏
灞陵車馬垂楊裏
京國城池落照間
暫放塵心遊物外
六街鐘鼓又催還

福州開元寺塔

唐周朴

開元寺裏七重塔
遙對方山影
擬齊雜俗人
看離世界

孤高僧上覺天低惟堪片片紫霞暎不與濛濛白霧迷
心若無私羅漢在參差免向日虹西

七言絕句

與夢得同登棲靈塔

唐白居易

半月悠悠在廣陵何樓何塔不同登共憐筋力猶堪在
上到棲靈第九層

塔頂

元郭鈺

塔頂新晴獨自登畫欄高倚十三層不知眼界高多少

地上行人似凍蠅

御定佩文齋詠物詩選卷二百三十五

欽定四庫全書

御定佩文齋詠物詩選卷二百三十六

僧家雜類

五言古

飯覆釜山僧

唐王維

晚知清淨理日與人羣
踈將候遠山僧先期掃
敝廬果從雲峯裏顧我
蓬蒿居藉草飯松屑焚
香看道書燃燈晝欲盡
鳴磬夜方初一悟寂為
樂此生閒有餘思歸何

必深身世猶空虛

七言古 附長短句

錫杖歌送明楚上人歸佛川 唐 皇甫曾

上人遠自西天至
頭陀行遍南朝寺
口翻貝葉古字經
手持金策聲泠泠
護法護身惟振錫
石瀨雲溪深寂寂
乍來松徑風露寒
遙暎霜天月成魄
後夜空山禪誦時
寥寥掛在松樹枝
眞法常傳心不住
東西南北隨緣路
佛川此去何時迴
應眞莫便遊天台

智達上人水晶念珠歌

唐歐陽詹

水已清中不易當其精精華極何宜更復加磨拭良
工磨拭成貫珠泓澄洞澈看如無星輝月耀莫之逾駭
雞照乘徒稱殊上人念佛泛真諦一佛一珠以為記既
指其珠當佛身亦欲珠明像佛智咨董母訪朱公得之
率璣羣竒中龍龕鷲嶺長隨躬朝自手持纖掌透夜來
月照紅條空窮川極陸難為寶孰說車渠將瑪瑙連連
寒溜下陰軒熒熒泣露垂秋草皎晶晶彰煌煌陸離電

熒紛不常凌眸暈目生光芒我來借問修行術數日殷
勤羨茲物上人視日授微言心淨如斯即是佛

五言律

秋夜北上精舍觀體如師梵

唐 劉長卿

焚香奏仙唄向夕遍空山清切兼秋遠威儀對月閒靜
分巖響答散逐海潮還幸得風吹去隨人到世間

飯僧

唐 王建

別屋炊香飯薰辛不入家溫泉調葛麩淨手摘藤花蒲

鮓除青葉片，蠶帶紫芽。願師常伴食，消氣有薑茶。

送志宏沙彌赴上元受戒

唐僧皎然

不肯資章甫，勝衣被木蘭。今隨秣陵信，欲及蔡州壇。野寺鐘聲遠，春山戒足寒。歸來次第學，應見後心難。

五言排律

過盧四員外宅看飯僧共題七韻

唐王維

三賢異七賢，青眼慕青蓮。乞飯從香積，裁衣學水田。上

人飛錫杖檀越施金錢
趺坐簷前日焚香
竹下煙寒空法雲
地秋色淨居天身
逐因緣法心過次第
禪不須愁日暮自有
一燈燃

七言律

宿瑩公禪房聞梵

唐李頎

花宮仙梵遠微微
月隱高城鐘漏稀
夜動霜林驚落葉
曉聞天籟發清機
蕭條已入寒空靜
颯沓仍隨秋雨飛
始覺浮生無住著
頓令心地欲皈依

奉和開元寺佛鉢

唐陸龜蒙

空王初受逞神功
四鉢須臾現一重
持次想添香積飯
覆時應帶步羅鐘
光寒好照金毛鹿
響靜堪降白耳龍
從此寶函香裏見
不煩西去詣靈峯

開元寺佛鉢詩

唐皮日休

帝青石作綠冰姿
曾得金人手自持
拘律廚過齋散後
提羅花下洗來時
乳麩味斷中天覺
麥麩香消大劫知
從此共君親頂戴
斜風應不等閒吹

水晶念珠

唐曹松

等量紅縷貫晶瑩
盡道勻圓別未勝
鑿斷玉潭盈尺水
琢成金地兩條冰
輪時祇恐星侵佛
挂處常疑露滴僧
幾度夜深尋不著
琉璃為殿月為燈

開元寺石鉢

明高啟

寶石當年琢帝青
浮波不異木杯輕
傳靈已歷乾陀國
乞食曾來舍衛城
漁父得時初獻洗
法王在日每擎行
寺僧見客休頻出
恐有藏龍此內驚

七言絕句

清閒上人

自蜀入洛於長壽寺說法度人

唐白居易

梓潼眷屬何年別
長壽壇場近日開
應是蜀人皆度了
法輪移向洛中來

定水寺行香

唐鄭谷

聽松看畫繞虛廊
風拂金爐待賜香
丞相未來春雪密
暫偷閒卧老僧牀

和聞梵

明曹學佺

山下層層起暮煙
山中一點佛燈然
僧家功課如常事
只有朝昏無歲年

御定佩文齋詠物詩選卷二百三十六